



Valentin Inzko čestitao Federici Mogherini

Nova Komisija EU imat će neprocjenjiv značaj u pružanju pomoći zemljama Zapadnog Balkana da uklone prepreke koje stoje na putu prosperiteta i sigurnosti, kaže se u pismu koje je visoki predstavnik Valentin Inzko danas uputio novoj potpredsjednici Komisije i visokoj predstavnici za vanjsku i sigurnosnu politiku Federici Mogherini.

Upućujući pismo na dan kada je novi predsjednik Komisije Jean-Claude Juncker objavio imena članova njegovog kabineta, ambasador Inzko je napomenuo da je prilikom susreta s gospodrom Mogherini na dvije nedavno održane međunarodne konferencije, u Beču i Dubrovniku, izrazio nadu da će tokom njenog mandata „biti moguće osigurati daleko veći stepen prosperiteta za ovaj region i omogućiti trajnu stabilnost na Zapadnom Balkanu.“

Ambasador Inzko je opisao ekonomsku i političku transformaciju regiona kao „zadatak naše generacije“, te je istaknuo da je i dalje optimista i da smatra da se tokom mandata nove Komisije može postići suštinski napredak.

U svojstvu ministrike vanjskih poslova, tokom italijanskog predsjedavanja EU, gospođa Mogherini je u julu posjetila region, uključujući i Bosnu i Hercegovinu. „Znam da su Vam dobro poznate mogućnosti i izazovi i da ste istovremeno svjesni potrebe da se te mogućnosti maksimalno iskoriste i da se izazovi rješavaju za dobrobit građana ovog regiona i za dobrobit građana širom Evropske unije“, napisao je ambasador Inzko.

Ambasador Inzko je danas također uputio pismo i baronici Catherine Ashton kako bi izrazio svoju iskrenu zahvalnost za sve što je učinila za Bosnu i Hercegovinu tokom njenog petogodišnjeg mandata na funkciji potpredsjednice i visoke predstavnice za vanjsku i sigurnosnu politiku.